

Samostalna zastupnica - Elza Gaković
Sarajevo, 20.08.2026. godine

ZA:
Vlada Kantona Sarajevo
Ministarstvo zdravstva
Zavod zdravstvenog osiguranja Kantona Sarajevo

U skladu sa članom 106. i 213. Poslovnika o Skupštine Kantona Sarajevo, dostavljam:

INICIJATIVU

Za uvrštavanje bezkateterskih inzulinskih pumpi i pripadajućeg potrošnog materijala u sistem zdravstvenog osiguranja

OBRAZLOŽENJE

U okviru sistema zdravstvenog osiguranja Kantona Sarajevo neophodno je omogućiti redovno obezbjeđivanje bezkateterskih (patch) inzulinskih pumpi i pripadajućeg potrošnog materijala za osigurane osobe sa dijabetesom tip 1 kojima je ovakav način terapije indiciran i odobren, kao što je i sa postojećim kateterskim pumpama. Savremeni pristup liječenju dijabetesa donosi nove terapijske mogućnosti i različite modele inzulinskih pumpi koji se po načinu primjene i tehničkim karakteristikama razlikuju od ranijih rješenja, zbog čega je potrebno pratiti razvoj medicinske tehnologije i omogućiti da se dostupne inovacije pravovremeno implementiraju i u praksu zdravstvenog sistema.

Bezkateterske inzulinske pumpe predstavljaju savremeni oblik kontinuirane inzulinske terapije i posebno su značajne za malu djecu, kod koje primjena klasičnih inzulinskih pumpi sa kateterom može predstavljati dodatno opterećenje i poteškoću u svakodnevnom životu. Ovakav način primjene inzulina omogućava veću praktičnost, fleksibilnost i lakše upravljanje terapijom, uz kontinuirano prilagođavanje potrebama djeteta.

S obzirom na to da su različiti modeli bezkateterskih inzulinskih pumpi registrovani za upotrebu u Bosni i Hercegovini, smatramo da postoji potreba da se njihova dostupnost uredi kroz sistem zdravstvenog osiguranja, na način koji bi osigurao jednak pristup terapiji za pacijente kojima je ova vrsta inzulinske terapije medicinski indicirana. Pri tome je važno naglasiti da pripadajući potrošni materijal za bezkateterske inzulinske pumpe po svojim fizičkim karakteristikama, načinu primjene i sastavnim dijelovima nije

istovjetan potrošnom materijalu za klasične inzulinske pumpe (infuzioni set, rezervoar i sl.), već se razlikuje i od modela do modela, zbog čega ga je potrebno posebno definisati i obuhvatiti sistemom nabavke.

Posebno ističem potrebu za sistemskim rješavanjem pitanja pripadajućeg potrošnog materijala, koji je neophodan za kontinuirano korištenje pumpe. Pumpa bez obezbijeđenog potrošnog materijala ne predstavlja potpunu terapijsku mogućnost, zbog čega je potrebno da i pumpa i materijal budu obuhvaćeni redovnim sistemom obezbjeđivanja i finansiranja.

Također, imajući u vidu način nabavke i raspodjele inzulinskih pumpi putem Federalnog zavoda zdravstvenog osiguranja i reosiguranja, postoji mogućnost da osigurana djeca iz Kantona Sarajevo dobiju bezkatetersku inzulinsku pumpu kroz federalni sistem. U tom slučaju neophodno je unaprijed definisati način obezbjeđivanja pripadajućeg potrošnog materijala na teret nadležnog zavoda, kako pacijenti nakon dobijanja pumpe ne bi ostali bez mogućnosti njenog kontinuiranog korištenja.

Stoga predlažem da Zavod razmotri mogućnost uvođenja bezkateterskih inzulinskih pumpi i pripadajućeg potrošnog materijala u redovni sistem zdravstvenog osiguranja Kantona Sarajevo, uz jasno definisane kriterije i proceduru ostvarivanja ovog prava za pacijente kojima je takva terapija odobrena.